

Bonbini

Pa basta aña kaba mi ta sinti un sierto reserva pa biaha bai Merka. E reserva akí no a disparsé. Tòg mi sa bai Merka regularmente, no pa plaser na promé lugá, pero mas bien pa motibu di negoshi. Orígen di mi iritashon ta sintá den 9/11. Mesora despues di e horibel suseso akí, hinter mundu a keda sekuestrá dor di e sintimentu di shòk di hendenan na Merka. Kon por tabata posibel ku un hende lo por a tribi ataká nan den nan propio teritorio! Hinter mundu a sinti e impakto!

Nan a intensifiká e proseduranan na imigrashon i ora di chèk-in fuertemente. Si b'a biaha fo'i Kòrsou pa Miami, bo tabata un sospechoso fo'i delantá kaba. Mi ta kòrda spesialmente e trato innesesariamente grosero i e rousmentu laf di funshonarionan di imigrashon i seguridat. Tur hende ta konvensí di e nesesidat pa mantené normanan di seguridat den tráfiko aereo. Nunka mi no a komprondé e nesesidat pa ta grosero den esaki. Un sonrisa no ta kostabo nada.

Na e momentu akí, algu komparabel ta sosodiendo den institutonan finansiero. Ultimo añanan reguladónan a oumentá e eksigensianan ku ta pone riba compliance serka institutonan finansiero, enormemente. Ultimo par di añanan akí, mundialmente, bankonan a paga den kareda di trinta bion na but. Komo konsekuensia di e eksigensianan intensifiká akí, tur hende ku ke habri un kuenta di banko, mester presentá kantidat di dato i prueba. Tambe si bo tin basta un par di aña komo kliente konosí i fiel, bo mester duna splikashon tokante tur bo selashi. 'Kon asina?' bo ta pensa e ora ei, 'bo konosé mi tòg?' Den hopi pais oropeo i tambe serka nos, bo ta haña bo ku un 'de-risking' ku ta tumando lugá na gran eskala tambe. Klientenan di institutonan finansiero ku ta mantené un kuenta, miéntras nan ta stablesé den eksterior òf den kaso ku nan no ta kumpli na otro maneranan ku e profil di 'rísiko' ku bankonan ta deseá, ta keda notifiká den un karta elektrónikamente trahá ku a anulá nan kuenta. Talbes pa esaki tambe por tin kompreshon pa e echo ku base di e medidanan akí ta pa seguridat di nos tur. Por ta nos ta bai haña un mundu mihó kaminda no tin lugá pa sèn shushi i tur lokual tin di ber ku esaki: trafikashon di hende muhé, trafikashon di droga, falsifikashon, etc.

Apesar djesei, akinan tambe mester keda vigilá e taya humano di un kliente. 99,9% di hende ta di bon boluntat i bonmucha. Aworaki nos ta benta e yu afó huntu ku e awa di baño: ta bèrdat ku bankonan aweró lo no tin bandidu mas entre di nan klientenan, pero na mes momentu tur nan otro klientenan a somentá. Fásilmente bo por evitá esaki dor di duna bo klientenan mas splikashon i dor di ta mas kariñoso i ofresé diskulpa pa e inkumbiniensia. Si funshonarionan di imigrashon i seguridat merikano lo por pèrmití nan mes pa hasi esaki, e ora ei un hende lo por kana drenta Merka ku plaser atrobe. Meskos ta konta pa bankonan.

E tersernan ku ta keda saka djente so, ta e finansiadónan fintek nobo. Nan (te ainda) ta sinti tiki molèster di reguladónan manera Bankonan Sentral. Nan ta benefisiá di e fasilidat ku kua hóbennan ta regla tur loke nan mester via internet, inkluso finansiamentu. Un banko ku tin edifisionan grandi ku hopi hende sintá tras di bali fuertemente protehá, atendiendo reinan largu di kliente ku ta warda, inevitablemente lo sali pèrdí kompará ku kompanianan virtual ku den un fregá di wowo i ku gastu minimal ta entregá loke e kliente ta deseá. Mas útil ainda ta e AliBaba- i Amazonnan di e mundu akí. Nan ta bende tur loke bo ke via internet, inkluso finansiamentu i reglamentu di esaki via un servisio bankario. Bankonan manera te ainda nos konosé nan ta manera e dinosouronan promé ku era di eis. Nan lo disparsé.

Talbes nò. Nan lo por hasi un diferensia tòg. Yama bo klientenan bonbiní! Splika bo klientenan despues di diskulpanan ekstenso ku den e kampo di mina di formulario- i obligashonnan, un grupo dediká di konsehero i amigu ta hasi nan máximo esfuerso pa yudabo personalmente. Esaki AliBaba no ta hasi. Bonbiní!



[Frank Kunneman](#)
VanEps Kunneman VanDoorne
Attorney at law | Partner

T +5999 461 3400 ext. 254
E kunneman@vandoorne.com
